

四庫全書

經部

欽定四庫全書

子部

湯液本草卷下

詳校官太醫院恩糧臣孔毓秀

編修臣倉聖脈覆勤

總校官檢討臣何思鈞

校對官中書臣湯垣

謄錄監生臣萬朝宗

欽定四庫全書

湯液本草卷下

元 王好古 撰

木部

桂

桂心 桂肉 桂枝 附

氣熱 味甘辛

有小毒

入手少陰經

桂枝入足太陽經

本草云主溫中利肝肺氣心腹寒熱冷疾霍亂轉筋
頭痛腰痛出汗止煩止唾欬嗽鼻癰墮胎堅骨節通
血脉理踈不足宣導百藥無所畏久服神仙不老生
桂陽二月八月十月採皮陰乾有菌桂牡桂木桂筒
桂肉桂板桂桂心官桂之類用者罕有分別衍義所
言不知何緣而得官之名予考本草有出觀賓宜韶
欽諸州者佳世人以筆畫多而懶書之故只作官也
如寫黃蘗作黃栢薑作姜同意菌桂生交趾山谷牡

桂生南海山谷木桂生桂陽從嶺至海盡有桂樹惟
郴州象州最多本草所說茵桂牡桂板桂厚薄不同
大抵細薄者為枝為嫩厚脂者為肉為老處其身者
為中也不必色黃為桂心但不用皮與裏止用其身
中者為桂心不經水而味薄者亦名榔桂易老用此
以治虛人使不生熱也衍義謂桂大熱素問謂辛甘
發散為陽故張仲景桂枝湯治傷寒表虛皆須此藥
是專用辛甘之意也又云療寒以熱故知三種之桂

不取茵桂牡桂者蓋此二種性止溫而已不可以治
風寒之病獨有一字桂本經謂甘辛大熱正謂素問
辛甘發散為陽之說尤知茵桂牡桂不及也然本經
止言桂而仲景又言桂枝者蓋亦取其桂上皮也其
本身麤厚處亦不中用諸家之說但各執一已見終
無證據今又謂之官桂不知何緣而立名慮後世以
為別物故於此書之又有桂心此則諸桂之心不若
一字桂也別說交廣商人所販者及醫家見用惟陳

藏器之說最是然筒桂厚實氣味厚重者宜入治臟
及下焦藥輕薄者宜入治眼目發散藥本經以茵桂
養精神以牡桂利關節仲景傷寒發汗用桂枝桂枝
者桂條也非身幹也取其輕薄而能發散一種柳桂
乃小嫩枝條也尤宜入上焦藥仲景湯液用桂枝發
表用肉桂補腎本乎天者親上本乎地者親下理之
自然性分之所不可移也一有差易為效彌遠歲月
既久習以成弊宜後世之不及古也桂心通神不可

言之至於諸桂數等皆大小老壯之不同觀作官也
本草所言有小毒或云久服神仙不老雖云小毒亦
從類化與黃芩黃連為使小毒何施與烏附為使止
是全得熱性若與有毒者同用則小毒既去大毒轉
甚與人參麥門冬甘草同用能調中益氣則可久服
可知此藥能護榮氣而實衛氣則在足太陽經也桂
心入心則在手少陰也若指榮字立說止是血藥故
經言通血脉也若與巴豆礪砂乾漆川山甲水蛭蠶

蟲如此有毒之類同用則小毒化為大毒其類化可知矣湯液發汗用桂枝補腎用肉桂小柴胡止云加桂何也藥象謂肉桂大辛補下焦熱火不足治沉寒痼冷及治表虛自汗春夏二時為禁藥

珍云秋冬治下部腹痛非桂不能止也

心云桂枝氣味俱輕故能上行發散於表內寒則肉桂補陽則柳桂辛熱散經寒引導陽氣若正氣虛者以辛潤之散寒邪治奔豚

栝子仁

氣平

味甘辛

無毒

本草云主安五臟除風濕痺益氣血能長生令人潤澤美顏色耳目聰明用之則潤腎之藥也

藥性論云栝子仁君惡菊花畏羊蹄草能治腰腎中冷膀胱冷膿宿水興陽道益壽去頭風治百邪鬼魅主小兒驚癇栝子仁古方十精丸用之

側栝葉

氣微溫

味苦

無毒

本草云主吐血衄血及痢血崩中赤白輕身益氣令人耐寒暑

藥性論云側柏葉苦辛性澁治冷風歷節疼痛止尿血與酒相宜

柏皮

本草黑字柏白皮主火灼爛瘡長毛髮

槐實

味苦酸鹹寒 無毒

珍云與桃仁治證同

藥性論云臣治大熱難產及煮汁治淋陰囊墜腫氣瘤
又槐白皮治口齒風疔

日華子云槐子治丈夫女人陰瘡濕痒催生吞七粒
皮治中風皮膚不仁喉痺洗五痔產門痒痛及湯火
瘡煎膏止痛長肉消癰腫

別錄云八月斷槐大枝使生嫩藥煮汁釀酒療大風

痿痺甚效槐耳主五痔心痛女人陰中瘡痛景天為
之使槐花味苦無毒治五痔心痛眼赤殺腹臟蟲及
熱治皮膚風腸風瀉血赤白痢槐膠主一切風化痰
治肝臟風筋脉抽掣急風口禁四肢不收頑痺或毒
風周身如蟲行或破傷風口眼偏斜腰膝強硬槐葉
平無毒煎湯洗小兒驚癇壯熱疥癬丁瘡皮莖同用
良

槐花

苦薄陰也

珍云涼大腸熱

蔓荊子

氣清

味辛溫苦甘

陽中之陰

太陽經藥

象云治太陽經頭痛頭昏悶除目暗散風邪藥胃虛
人勿服恐生痰疾揀淨杵碎用

珍云涼諸經血止頭痛主目睛內痛

本草云惡烏豆石膏

大腹子

氣微溫

味辛無毒

本草云主冷熱氣攻心腹大腸壅毒痰膈醋心並以薑鹽同煎時習謂是氣藥也

孫真人云先酒洗後大豆汁洗仲景用

日華子云下一切氣止霍亂通大小腸健脾開胃調

中

酸棗

氣平

味酸

無毒

本草云主心腹寒熱邪結氣聚四肢酸疼濕痺煩心
不得眠臍上下痛血轉久泄虛汗煩渴補中益肝氣
堅筋骨助陰氣令人肥健久服安五臟輕身延年

胡洽治振悸不得眠人參白朮白茯苓甘草生薑酸
棗仁六物煮服

聖惠方膽虛不眠寒也酸棗仁炒香竹葉湯調服

胡椒

氣溫

味辛

無毒

本草云主下氣溫中去痰除臟腑中風冷向陽者為胡椒向陰者為萆澄茄胡椒多服損肺味辛辣力大於漢椒

衍義云去胃中寒痰吐水食已即吐甚驗過劑則走氣大腸寒滑亦用須各以他藥佐之

川椒

氣熱溫

味大辛

辛溫大熱有毒

象云主邪氣溫中除寒痺堅齒髮明目利五臟瀕炒
去汗

心云去汗辛熱以潤心寒

本草云主邪氣欬逆溫中逐骨節皮膚死肌寒濕痺
痛下氣除六腑寒冷傷寒溫瘧大風汗不出心腹留
飲宿食腸澼下痢泄精女子字乳飲疾散風邪癥結
水腫黃疸鬼疰蟲毒耐寒暑開腠理閉口者殺人惡

括萋防葵畏雌黃

吳茱萸

氣熱

味辛苦

氣味俱厚陽中陰也

辛溫大熱

有小毒

入足太陰經少陰經厥陰經

象云食則令人口閉目證寒邪所膈氣不得上下此病不已令人寒中腹滿膨脹下利寒氣諸藥不可代也洗去苦味日乾杵碎用

心云去胃中逆氣不宜多用辛熱恐損元氣

珍云溫中下氣溫胃

本草云主溫中下氣止痛欬逆寒熱除濕血痺逐風
邪開腠理去痰冷腹內絞痛諸冷實不消中惡心腹
痛逆氣利五臟入足太陰少陰厥陰震坤合見其色
綠

仲景云吳茱萸湯當歸四逆湯大溫脾湯又脾胃藥
皆用此也

衍義云此物下氣最速腸虛人服之愈甚蓼實為之
使惡丹參硝石白堊畏紫石英

山茱萸

氣平

微溫

味酸

無毒

入足厥陰經少陰經

本草云主溫中逐寒濕痺強陰益精通九竅止小便
入足少陰厥陰

聖濟經云滑則氣脫澁劑所以收之山茱萸之澁以

收其滑仲景八味丸用為君主知是溢劑以通九竅
雷公云用之去核一斤取肉四兩緩火熬用能壯元
氣秘精核能滑精故去之

珍云溫肝

本經云止小便利以其味酸也觀八味丸用為君主
其性味可知矣

藥性論云補腎添精

日華子亦云煖腰膝助水臟也

益智

氣熱

味大辛

辛溫無毒

主君相二火手足太陰經

足少陰經

本是脾經藥

象云治脾胃中受寒邪和中益氣治多唾當於補中藥內兼用之勿多服去皮用

本草云主遺精虛漏小便遺瀝益氣安神補不足安

三焦調諸氣夜多小便者取二十四枚碎之入鹽同煎服有神效

液云主君相二火手足太陰足少陰本是脾藥在集香丸則入肺在四君子湯則入脾在大鳳髓丹則入腎脾肺腎互有子母相關

厚朴

氣溫 味辛 陽中之陰 苦而辛

無毒

象云能治腹脹若虛弱雖腹脹宜斟酌用之寒脹是
大熱藥中兼用結者散之神藥誤用脫人元氣切禁
之紫色者佳去皮薑汁製微炒

珍云去腹脹厚腸胃

心云味厚陰也專去腹脹滿去邪氣

本草云主中風傷寒頭痛寒熱驚悸氣血痺死肌去
三蟲溫中益氣消痰下氣療霍亂及腹痛脹滿胃中
冷逆胃中嘔不止泄痢淋露除驚去留熱心煩滿厚

腸胃

本經云治中風傷寒頭痛温中益氣消痰下氣厚腸
胃去腹脹滿果泄氣乎果益氣乎若與枳實大黃同
用則能泄實滿本經謂消痰下氣者是也若與橘皮
蒼朮同用則能除濕滿本經謂温中益氣者是也與
解利藥同用則治傷寒頭痛與痢藥同用則厚腸胃
大抵苦温用苦則泄用温則補

衍義云平胃散中用之最調中至今盛行既能温脾

胃又能走冷氣

海藏云加減隨證如五積散治療同

本草又云乾薑為使惡澤瀉寒水石硝石

丁香

氣溫

味辛

純陽

無毒

入手太陰經

足陽明經少陰經

象云溫脾胃止霍亂消痞疝氣脹反胃腹內冷痛壯

陽煖腰膝救酒毒

珍云去胃中之寒

本草云主溫脾胃止霍亂擁脹風毒諸腫牙齒疔墮
能發諸香能療反胃腎氣奔豚氣陰痛壯陽煖腰膝
消瘰癧除冷勞

液云與五味子廣茂同用亦治奔豚之氣能泄肺能
補胃大能療腎

沉香

氣微溫 陽也

本草云治風水毒腫去惡氣能調中壯陽煖腰膝破
癥癖冷風麻痺骨節不任濕風皮膚痒心腹痛氣痢
止轉筋吐瀉

東垣云能養諸氣上而至天下而至泉用為使最相
宜

珍云補右命門

乳香

苦陽

珍云定諸經之痛

藿香

氣微溫

味甘辛

陽也

甘苦

純

陽

無毒

入手足太陰經

象云治風水去惡氣治脾胃吐逆霍亂心痛去枝梗

用葉

心云芳馨之氣助脾開胃止嘔

珍云補衛氣益胃進食

本草云主脾胃嘔逆療風水毒腫去惡氣療霍亂心痛溫中快氣治口臭上焦壅煎湯漱口入手足太陰入順氣烏藥則補肺入黃芪四君子湯則補脾

檀香

氣溫

味辛熱

無毒

入手太陰經

足少陰經

通行陽明經藥

本草云主心腹痛霍亂中惡鬼氣殺蟲入云治腎氣諸痛腹痛消熱腫

東垣云能調氣而清香引芳香之物上行至極高之分最宜橙橘之屬佐以薑棗將以葛根豆蔻縮砂益智通行陽明之經在胃膈之上處咽嗑之中同為理氣之藥

珍云主心腹霍亂中惡引胃氣上升進食

蘇合香

味甘溫

無毒

本草云主辟惡殺鬼精物溫瘧蠱毒癩瘡去三蟲除
邪令人無夢魘久服通神明輕身長年生中臺中谷
禹錫云按梁書云中天竺國出蘇合香是諸香汁煎
之非自然一物也

檳榔

氣溫

味辛苦

味厚氣輕陰中陽也

純陽

無毒

象云治後重如神性如鐵石之沉重能墜諸藥至於
下極杵細用

心云苦以破滯辛以散邪專破滯氣下行

珍云破滯氣泄胃中至高之氣

本草云主消穀逐水除痰癖下三蟲去伏尸療寸白

蟲

梔子

氣寒

味微苦

味苦性大寒味薄陰中陽

也

無毒

入手太陰經

象云治心煩懊懣而不得眠心神顛倒欲絕血滯小便不利杵細用

心云去心中客熱除煩躁與豉同用

珍云止渴去心懊懣煩躁

本草云主五內邪氣胃中熱氣面赤酒皸鼻白癩
赤癩瘡瘍瘵目熱赤痛胃心大小腸太熱心中煩悶
胃中熱氣

仲景用梔子治煩胃為至高之分也故易老云輕浮
而象肺色赤而象火故能瀉肺中之火本草不言
吐仲景用此為吐藥梔子本非吐藥為邪氣在上拒
而不納故令上吐邪因得以出經曰其高者因而越
之此之謂也或用梔子利小便實非利小便清肺也

肺氣清而化膀胱為津液之府小便得此氣化而出也本經謂治大小腸熱辛與庚合又能泄戊其先入中州故也入手太陰梔子豉湯治煩躁煩者氣也躁者血也氣主肺血主腎故用梔子以治肺煩用香豉以治腎躁躁者懊懣不得眠也少氣虛滿者加甘草若嘔噦者加生薑橘皮下後腹滿而煩梔子厚朴枳實湯下後身熱微煩梔子甘草乾薑湯梔子大而長者染色不堪入藥皮薄而圓七稜至九稜者名山梔

子所謂越桃者是也

衍義云仲景治傷寒發汗吐下後虛煩不得眠若劇者必反覆顛倒心中懊憹以梔子豉湯治虛煩故不用大黃以有寒毒故也梔子雖寒無毒治胃中熱氣既亡血亡津液臟腑無潤養內生虛熱非此不可除又治心經留熱小便赤澀去皮山梔子火煨大黃連翹甘草炙等分末之水煎三錢匕服之無不效

仲景傷寒論及古今諸名醫治發黃皆用梔子茵陳

香豉甘草四物等分作湯飲之又治大病起勞復皆
用梔子鼠矢等湯並利小便而愈其方極多不可悉
載用仁去心留中熟用皮去肌表熱

黃蘗

氣寒

味苦

苦厚微辛陰中之陽降也

無毒

足太陽經引經藥

足少陰經之劑

象云治腎水膀胱不足諸痿厥脚膝無力於黃芪湯中少加用之使兩膝中氣力湧出痿即去矣蜜炒此一味為細末治口瘡如神癰瘻必用之藥

珍云瀉膀胱之熱利下竅

心云太陽經引經藥瀉膀胱經火補本經及腎不足若寒安虻療下焦虛堅腎經曰苦以堅之

本經云主五臟腸胃中結熱黃疸腸痔止泄痢女子漏下赤白陰傷蝕瘡療驚風在皮間肌膚熱赤起目

熱赤痛口瘡久服通神

液云足少陰劑腎苦燥故腎停濕也梔子黃芩入肺
黃連入心黃蘗入腎燥濕所歸各從其類也活人書
解毒湯上下內外通治之惡乾漆

枳實

氣寒

味苦酸鹹

純陰

無毒

象云除寒熱破結實消痰癖治心下痞逆氣脇痛麩
炒用

心云潔古用去脾經積血故能去心下痞脾無積血則心下不痞治心下痞散氣消宿食苦寒多用破水積以泄裏除氣

珍云去胃中濕

本草云主大風在皮膚中如麻豆苦痒除寒熱結止痢長肌肉利五臟益氣輕身除胃脇痰癖逐停水破結實消脹滿心下急痞痛逆氣脇風痛安胃氣止瀉泄明目生河內川澤商州者佳益氣則佐之以人參

乾薑白朮破氣則佐之以大黃牽牛芒硝此本經所以言益氣而復言消痞也非白朮不能去濕非枳實不能除痞殼主高而實主下高者主氣下者主血主氣在胃膈主血者在心腹仲景治心下堅大如盤水飲所作枳實白朮湯主之枳實七枚朮三兩水一斗煎取三升分三服腹中軟即消

衍義云枳殼枳實一物也小則性酷而速大則性詳而緩故仲景治傷寒倉卒之病承氣湯中用枳實此

其意也皆取其疎通決泄破結實之意他方但導敗
風壅之氣可常服者故用枳殼故胃中痞有桔梗枳
殼湯心下痞有枳實白朮湯高低之分易老詳定為
的也

枳殼

氣寒

味苦

苦而酸微寒

味薄氣厚

陽也陰中微陽

無毒

象云治脾胃痞塞泄肺氣麩炒用

心云治胃中氣勝濕化痰勿多用損胃中至高之氣
珍云破氣

本草云主風痺麻痺通利關節勞氣欬嗽背膊悶倦
散留結胃膈痰滯逐水消脹滿大腸風安胃止風痛
藥性論云枳殼使味苦辛治遍身風疹肌中如麻豆
惡痒殼高生皮毛胸膈之病實主心胃之病其主治
大同小異

牡丹皮

氣寒

味苦辛

陰中微陽辛苦微寒

無毒

手厥陰經

足少陰經

象云治腸胃積血及衄血吐血必用之藥

珍云涼骨蒸

本草云主寒熱中風痙瘓痲驚癰邪氣除癥堅瘕血
留舍腸胃安五臟療癰瘡除時氣頭痛客熱五勞之

氣腰痛風喎癱疾

易老云治神志不足神不足者手厥陰志不足者足少陰故仲景八味丸用之牡丹乃天地之精羣花之首葉為陽發生花為陰成實丹為赤即火故能瀉陰中之火牡丹皮手厥陰足少陰治無汗骨蒸地骨皮足少陰手少陽治有汗骨蒸也

地骨皮

氣寒

味苦

陰也大寒

無毒

足少陰經

手少陽經

象云解骨蒸肌熱主風濕痺消渴堅筋骨去骨用根皮

心云去肌熱及骨中之熱

珍云涼血涼骨

本草云主五內邪氣熱中消渴周痺風濕下胃脇氣客熱頭痛補內傷大勞嘔吸堅筋骨強陰利大小腸

藥性論云根皮細剉麪拌熟煮吞之主腎消風益精
氣

衍義云枸杞當用梗皮地骨當用根皮枸杞子當用
其紅實實微寒皮寒根大寒

猪苓

氣平 味甘苦甘寒 甘苦而淡甘重於苦

陽也 無毒

入足太陽經少陰經

象云除濕比諸淡滲藥大燥亡津液無濕證勿服去
皮用

心云苦以泄滯甘以助陽淡以利竅故能除濕利小
便

珍云利小便

本草云主欬瘧解毒蠱症不祥利水道能療姙娠淋
又治從脚上腹腫小便不利仲景少陰渴者猪苓湯
入足太陽少陰

衍義云行水之功多久服必損腎氣昏人目果欲久服者更宜詳審

茯苓

氣平

味淡

味甘而淡陽也

無毒

白者入手太陰經足太陽經少陽經

赤者入足太陰經手太陽經少陰經

象云止渴利小便除濕益燥和中益氣利腰臍間血
為主治小便不通溺黃或赤而不利如小便利或數

服之則大損人目如多汗人服之損真氣天人壽醫
云赤瀉白補上古無此說去皮用

心云淡能利竅甘以助陽除濕之聖藥也味甘平補
陽益脾逐水濕淫所勝小便不利淡味滲泄陽也治
水緩脾生津導氣

珍云甘純陽滲泄止渴

本草云主胃脇逆氣憂恚驚邪恐悸心下結痛寒熱
煩滿欬逆口焦舌乾利小便止消渴好唾大腹淋瀝

消膈中痰水水腫淋結開胃腑調臟氣伐腎邪長陰
益氣力保神守中

液云入足少陰手足太陽色白者入辛壬癸赤者入
丙丁伐腎邪小便多能止之小便澁能利之與車前
子相似雖利小便而不走氣酒浸與光明硃砂同用
能祕真味甘平如何是利小便

茯神

陽也

味甘

無毒

珍云治風眩心虛非此不能安

藥性論云君主驚癇安神定志補虛乏主心下急痛
堅滿人虛而小便不利者

烏藥

氣溫 味辛 無毒

入足陽明經少陰經

本草云主中惡心腹痛蠱毒疰鬼氣宿食不消婦
人血氣小兒腹中諸蟲又云去猫涎極妙烏藥葉及

根嫩時採作茶片炙碾煎服能補中益氣偏止小便
滑數

乾漆

氣溫平

味辛

無毒有毒

本草云主絕傷補中續筋骨填髓腦安五臟治五緩
六急風寒濕痺療欬嗽消瘀血痞結腰痛女子疝瘕
利小腸去虻蟲生漆去長蟲半夏為之使畏雞子忌

油脂

皂莢

氣溫

味辛鹹

有小毒

引入厥陰經藥

本草云主風痺死肌邪氣風頭淚出利九竅療腹脹
滿消穀除欬嗽治囊縮婦人胞不落明目益精可為
沫藥不入湯

日華子云通關節除頭風消痰殺勞蟲治骨蒸開胃
破堅癥腹中痛能墮胎栢實為之使惡麥門冬畏空

青人參苦參

仲景治欬逆上氣唾濁但坐不得卧皂莢丸主之杵末一物蜜丸桐子大用棗湯服一九日三夜一活人書治陰毒正陽散內用皂莢引入厥陰也用之有蜜炙酥炙燒灰之異等分依方

竹葉

氣平

味辛又苦大寒

辛平無毒

本草云主欬逆上氣溢筋急惡瘍治小蟲除煩熱風

瘰癧喉痺嘔吐

仲景竹葉湯用淡竹葉

心云除煩熱緩皮而益氣

珍云陰中微陽涼心經

竹茹

氣微寒 味苦

本草云主嘔瀝溫氣寒熱吐血崩中益筋

淡竹葉

氣寒

味辛平

本草云主胃中痰熱欬逆上氣

藥性論云淡竹葉主吐血熱毒風壓丹石藥毒止渴
日華子云淡竹及根消痰治熱狂煩悶中風失音不
語壯熱頭痛頭風并懷孕婦人頭旋倒地止驚悸溫
痰迷悶小兒驚癇天吊莖葉同用見局方本草今附
錄於此

茗苦茶

氣微寒

味苦甘

無毒

入手足厥陰經

液云臘茶是也清頭目利小便消熱渴下氣消食令人少睡中風昏憤多睡不醒宜用此入手足厥陰茗苦茶苦甘微寒無毒主癭瘡利小便去痰熱渴治陰證湯藥內用此去格拒之寒及治伏陽大意相似茶苦經云苦以泄之其體下行如何是清頭目

秦皮

氣寒

味苦

無毒

液云主熱利下重下焦虛經云以苦堅之故用白頭
翁黃蘗秦皮苦之劑也治風寒濕痺目中青翳白膜
男子少精婦人帶下小兒驚癇宜作湯洗目俗呼為
白椽木取皮漬水浸出青藍色與紫草同用以增光
暈尤佳大戟為之使惡吳茱萸

桑白皮

氣寒

味苦酸

甘而辛

甘厚辛薄

無毒

入手太陰經

象云主傷中五勞羸瘦補虛益氣除肺氣止唾血熱
渴消水腫利水道

心云甘以固元氣辛以瀉肺氣之有餘

本草云治傷中五勞六極羸瘦崩中脉絕補虛益氣
去肺中水氣唾血熱渴水腫腹滿臚脹利水道去寸
白可縫金瘡出上者殺人續斷麻子挂心為之使忌

鐵鉛

梓白皮

氣寒

味苦

無毒

本草云主熱去三蟲治目中疾生河內山谷今近道
皆有之木似梧桐

紫葳

即凌霄花

氣微寒

味酸

無毒

本草云主婦人產乳餘疾崩中癥瘕血閉寒熱羸瘦

養胎益葉味苦無毒主痿癭益氣

日華子云根治熱風身痒遊風風疹治痰血帶下花
葉功用同又云凌霄花治酒醱熱毒風刺婦人血膈
遊風崩中帶下

衍義云木也紫葳花是也畏鹵鹹

訶黎勒

氣溫

味苦

苦而酸性平

味厚陰也

降也苦重酸性

無毒

象云主腹脹滿不下飲食消疾下氣通利津液破胃
膈結氣治久痢赤白腸風去核搗細用

心云經曰肺苦氣上逆急食苦以泄之以酸補之苦
重瀉氣酸輕不能補肺故嗽藥中不用俗名訶子隨
風子

本草云主冷氣心腹滿下食仲景治氣痛以訶黎勒
十枚麩裹煨灰火中煨之令麩黃熟去核細研為末
和粥飲頓服

衍義云氣虛人亦宜緩緩煨熟少服此物能澁腸而
又泄氣蓋其味苦澁故爾其子味熟時風飄墮者謂
之隨風子

杜仲

味辛甘平溫無毒陽也降也

本草云主腰脊痛補中益精氣堅筋骨強志除陰下
濕痒小便餘瀝脚中酸疼不欲踐地久服輕身耐老
惡蛇脫皮玄參

日華子云煖治腎勞腰脊攣入藥灸用

琥珀

氣平

味甘

陽也

珍云利小便清肺

本草云安五臟定魂魄消瘀血通五淋杵細用

藥性論云君治產後血疼痛

日華子云療蟲毒壯心明目磨翳止心痛癩邪破癥

結

郁李仁

味苦辛

陰中之陽

辛苦陰也

珍云破血潤燥

本草云郁李根主齒斷腫齧齒堅齒去白蟲

藥性論云根治齒痛宣結氣破積聚

日華子云根涼無毒治小兒發熱作湯浴風蟲牙濃

煎含之

巴豆

氣溫

味辛

生溫熟寒

有大毒

本草云主傷寒溫瘧寒熱破癥瘕結聚堅積留飲痰癖大腹水脹蕩滌五臟六腑開通閉塞利水殺道去惡肉除鬼毒蠱症邪物殺蟲魚療女子月閉爛胎金瘡膿不利丈夫陰癩殺斑猫毒健脾胃

易老云斬關奪門之將大宜詳悉不可輕用

雷公云得火則良若急治為水殺道路之劑去皮心膜油生用若緩治為消堅磨積之劑炒煙去令紫黑

研用可以通腸可以止泄世所不知也仲景治百病
客忤備急圓主之巴豆杏仁例及加減寒熱佐使五
色并餘例並見元戎

珍云去胃中寒濕

芫花

氣溫 味辛苦 有小毒

本草云主欬逆上氣喉鳴喘急咽腫短氣蠱毒母鬼瘧
癰腫疔瘕殺蟲魚消胃中痰水喜去聲唾水腫五水

在五臟皮膚及腰痛下寒毒內毒久服令人虛仲景
治太陽中風脇下痛嘔逆者可攻十棗湯主之

液云胡洽治痰癖飲癖加以大黃甘草五物同煎以
相反主之欲其大吐也治之大畧水者肺腎胃三經
所主有五臟六腑十二經之部分上而頭中而四肢
下而腰臍外而皮毛中而肌肉內而筋骨脉有尺寸
之殊浮沉之異不可輕瀉當知病在何經何臟誤用
則害深然大意泄濕內云五物者即甘遂大戟芫花

大黃甘草也

蘇木

氣平

味甘鹹

甘而酸辛性平

甘勝

於酸辛

陽中之陰也無毒

本草云主破血產後血脹悶欲死者排膿止痛消癰
腫瘀血婦人月水不調及血暈口噤

心云性平甘勝於酸辛去風與防風同用

珍云破死血

川練子

氣寒

味苦平

有小毒

本草云治傷寒大熱煩躁殺三蟲疥瘍利小便杵細用

珍云入心主上下部腹痛

金鈴子

酸苦

陰中之陽

珍云心暴痛非此不能除即川練子也

沒藥

味苦平

無毒

本草云主破血止痛療金瘡杖瘡諸惡瘡痔漏卒下
血目中翳暈痛膚赤生波斯國似安息香其塊大小
不定黑色

梧桐淚

味鹹

珍云瘰癧非此不能除

本草云味鹹苦大寒無毒主大毒熱心腹煩漏水和服之取土又主牛馬急黃黑汗水研三二兩灌之立瘥

日華子云治風蟲牙齒痛殺火毒并麩毒

海藏云主風疔蠱齒牙疼痛骨槽風勞能軟一切物多服令人吐也又為金銀鐸藥

桑東南枝

時習云根暖無毒研汁治小兒天吊驚癇客忤及傳

鵝口瘡大效

果部

大棗

氣溫

味甘

氣厚陽也

無毒

珍云味甘補經不足以緩陰血

液云主養脾氣補津液強志三年陳者核中仁主腹痛惡氣卒疝忤治心懸經云助十二經脉治心腹邪氣和百藥通九竅補不足氣生者多食人腹脹注泄

蒸熟食補腸胃肥中益氣中滿者勿食甘甘者令人中滿故大建中湯心下痞者減飴棗與甘草同例

生棗

味甘辛

多食令人多寒熱羸瘦者不可食葉覆麻黃能令出汗生河東平澤殺烏頭毒

陳皮

氣溫

味微苦

辛而苦

味厚陰也

無毒

象云能益氣加青皮減半去滯氣推陳致新若補脾胃不去白若理胃中肺氣須去白

心云導胃中滯氣除客氣有白朮則補脾胃無白朮則瀉脾胃然勿多用也

珍云益氣利肺有甘草則補肺無甘草則瀉肺

本草云主胃中痰熱逆氣利水穀下氣止嘔欬除膀胱留熱停水五淋利小便主脾不能消穀氣衝胃中

吐逆霍亂止瀉去寸白蟲能除痰解酒毒海藏治酒
毒葛根陳皮茯苓甘草生薑湯手太陰氣逆上而不
下宜以此順之陳皮白檀為之使其芳香之氣清奇
之味可以奪橙也

青皮

氣溫 味辛 苦而辛性寒氣厚陰也

足厥陰經引經藥

又入手少陽經

象云主氣滯消食破積結膈氣去穰

心云厥陰經引經藥也有滯氣則破滯氣無滯氣則損真氣

液云主氣滯下食破積結及膈氣或云與陳皮一種青皮小而未成熟成熟而大者橘也色紅故名紅皮日久者佳故名陳皮如枳實枳殼一種實小而輕未穰殼大而黃紫色已穰故殼高而治胃膈實低而治心下與陳皮治高青皮治低同意又云陳皮青皮二

種枳實枳殼亦有二種

桃仁

氣溫

味苦甘性平

苦重於甘陰中陽也

無毒

入手足厥陰經

象云治大便秘血結血燥通潤大便七宣丸中專
治血結破血以湯浸去皮尖研如泥用

心云苦以泄滯血甘以生新血故凝血須用又去血

中之熱

本草云主瘀血閉癥瘕邪殺小蟲止欬逆上氣消
心下堅除卒暴擊血通月水止痛破血入手足厥陰
衍義云老人虛秘與栝子仁大麻仁松子仁等分同研鎔白
蠟和丸如桐子大以少黃丹湯下仲景治中焦畜血用之
杏仁

氣溫 味甘苦冷利 有小毒

入手太陰經

象云除肺燥治風燥在胃膈間麩炒去皮尖用

心云散結潤燥散肺之風及熱是以風熱嗽者用之
本草云主欬逆上氣雷鳴喉痺下氣產乳金瘡寒心
賁脈驚癇心下煩熱風氣往來時行頭痛解肌消心
下急殺狗毒破氣入手太陰王朝奉治傷寒氣上喘
衝逆者麻黃湯內加杏仁陳皮若氣不喘衝逆者減
杏仁陳皮知其能瀉肺也

東垣云杏仁下喘用治氣也桃仁療狂用治血也桃

杏仁俱治大便秘當以氣血分之晝則難行陽氣也夜則難便行陰氣也大腸雖屬庚為白若以晝夜言之氣血不可不分也年虛人大便秘不可過泄者脉浮在氣杏仁陳皮脉沉在血桃仁陳皮所以俱用陳皮者以其手陽明病與手太陰俱為表裏也賁門上主往來魄門下主收閉故王氏言肺與大腸為通道也

烏梅

氣平

味酸

酸溫陽也

無毒

象云主下氣除熱煩滿安心調中治痢止渴以鹽為
白梅亦入除藥去核用

心云收肺氣

本草云主肢體痛偏枯不仁死肌去青黑痣惡疾止下
痢好唾口乾去骨間熱又方治一切惡瘡肉出以烏梅
燒為灰杵末傅上惡肉立盡仲景治吐衄下利烏梅丸

木瓜

氣溫

味酸

入手足太陰經

本草云治脚氣濕痺邪氣霍亂大吐下轉筋不止益肺而去濕和胃而滋脾

衍義云木瓜得木之正故入筋以鉛白霜塗之則失酸味受全制也此物入肝故益筋與血病腰腎脚膝無力此物不可缺也

東垣云氣脫則能收氣滯則能和

雷公云調榮衛助穀氣是也

菜部

荊芥穗

氣溫

味辛苦

本草云辟邪毒利血脉通宣五臟不足氣能發汗除
勞渴杵和醋封毒腫去枝梗手搓碎用治產後血暈
如神動渴疾多食薰五臟神破結氣

生薑

氣溫

味辛

辛而甘微溫

氣味俱輕

陽也無毒

象云主傷寒頭痛鼻塞欬逆上氣止嘔吐治痰嗽生
與乾同治與半夏等分治心下急痛鉉細用

心云能制半夏厚朴之毒發散風寒益元氣大棗同
用辛溫與芍藥同用溫經散寒嘔家之聖藥也辛以
散之嘔為氣不散也此藥能行陽而散氣

珍云益脾胃散風寒久服去臭氣通神明

孫真人云為嘔家之聖藥

或問東垣曰生薑辛溫入肺如何是入胃口曰俗皆以心下為胃口者非也咽門之下受有形之物係胃之系便為胃口與肺同處故入肺而開胃口也又問曰人云夜間勿食生薑食則令人閉氣何也曰生薑辛溫主開發夜則氣本收斂反食之開發其氣則違天道是以不宜食此以平人論之可也若有病則不然薑屑比之乾薑不熱比之生薑不潤以乾生薑代

乾薑者以其不僭故也

本草云秦椒為之使殺半夏芩宿毒惡黃芩黃連天
鼠糞

乾薑

氣熱

味大辛

辛大熱

味薄氣厚

陽中之陽也

辛溫無毒

象云治沉寒痼冷腎中無陽脉氣欲絕黑附子為引
用水煎二物名薑附湯亦治中焦有寒水洗慢火炮

心云發散寒邪如多用則耗散元氣辛以散之是壯火食氣故也須以生甘草緩之辛熱裏寒散陰寒肺寒與五味同用治嗽以勝寒虯正氣虛者散寒與人參同補藥溫胃腹中寒其平辛熱

珍云寒淫所勝以辛散之經炮則味苦

本草云主胃滿欬逆上氣溫中止血出汗逐風濕痺腸癖下痢寒冷腹痛中惡霍亂脹滿風邪諸毒皮膚間結氣止唾血生者尤良主胃滿溫脾燥胃所以理

中其實主氣而泄脾

易老云乾薑能補下焦去寒故四逆湯用之乾薑本
味辛及見火候稍苦故止而不移所以能治裏寒非
若附子行而不止也理中湯用此者以其四順也
或云乾薑味辛熱人言補脾今言泄而不言補者何
也東垣謂泄之一字非泄脾之正氣也是泄脾中寒
濕之邪故以薑辛熱之劑燥之故曰泄脾也

薄荷

氣溫

味辛苦

辛涼

無毒

手太陰經厥陰經藥

象云能發汗通骨節解勞乏與薤相宜新病瘥人勿
多食令虛汗出不止去枝梗搓碎用

心云上行之藥

陳士良云能引諸藥入榮衛又主風氣壅併

葱白

氣溫

味辛

無毒

入手太陰經

足陽明經

液云以通上下之陽也活人書傷寒頭痛如破連頸
葱白湯主之

心云通陽氣辛而甘氣厚味薄陽也發散風邪

本草云葱實主明目補中不足其莖白平可作湯主
傷寒寒熱出汗中風面目腫傷寒骨肉痛喉痺不通
安胎歸心除肝邪氣安中利五臟益目精殺百藥毒

葱根主傷寒頭痛葱汁平溫主溺血解藜蘆毒

韭白

氣溫

味辛

微酸

無毒

本草云歸心安五臟除胃中熱利病人可久食子主
夢泄精溺白根養髮陰物變為陽

薤白

氣溫

味苦辛

無毒

入手陽明經

本草云主金瘡瘡敗輕身不飢耐老除寒熱去水氣
濕中散結利病人諸瘡中風寒水腫以此塗之下重
者氣滯也四逆散加此以泄氣滯

心云治泄痢下重下焦氣滯泄滯氣

瓜蒂

氣寒 味苦 有毒

本草云治大水身面四肢浮腫下水殺蠱毒欬逆上
氣及食諸果病在胃腹中者皆吐下之去鼻中息肉

療黃疸鼻中出黃水除偏頭疼有神頭目有濕宜此
瓜蒂苦以治胃中寒與白虎同例俱見知母條下真
麝香細辛同為使治久不聞香臭仲景鈐方瓜蒂一
十四箇丁香一箇黍米四十九粒為末合水搗一字
取下

冬葵子

氣寒 味甘 無毒

本草云主五臟六腑寒熱羸瘦五癰利小便療婦人

乳難內閉久服堅筋骨長肌肉輕身

衍義云性滑利不益人患癰瘡毒熱內攻未出膿者
水吞三五粒遂作竅膿出

蜀葵花

冷陰中之陽

珍云赤者治赤帶白者治白帶赤治血燥白治氣燥

香薷

味辛微溫

本草云主霍亂腹痛吐下散水腫

炊單布

液云仲景治墜馬及一切筋骨損方中用時習補入

米穀部

粳米

氣微寒

味甘苦

甘平無毒

入手太陰經少陰經

液云主益氣止煩止渴止泄與熟鷄頭相合作粥食

之可以益精強志耳目聰明本草諸家共言益脾胃如何白虎湯用之入肺以其陽明為胃之經包為西方之白故入肺也然治陽明之經即在胃也包白味甘寒入手太陰又少陰證桃花湯用此甘以補正氣竹葉石膏湯用此甘以益不足

衍義云平和五臟補益胃氣其功莫遠然稍生則復不益脾過熟則佳

赤小豆

氣溫

味辛甘酸

陰中之陽

無毒

本草云主下水排膿寒熱中消渴止洩利小便吐
逆卒澀下脹滿又治水腫通健脾胃赤小豆食之行
小便久食則虛人今人黑瘦枯燥赤小豆花治宿酒
渴病即腐婢也花有腐氣故以名之與葛花末服方
寸匕飲酒不知醉氣味平辛大豆黃卷是以生豆為
藥待其芽出便曝乾用方書名黃芩皮產婦藥中用
之性平

黑大豆

氣平 味甘

本草云塗癰腫煮汁飲殺鬼毒止痛解烏頭毒除胃
中熱脾傷中淋露逐水脹下瘀血久服令人身重炒
令黑烟未斷熱投酒中治風痺癰瘡口噤產後諸風
食罷生服半掬去心胃煩熱明目鎮心不忘惡五參
龍膽得前胡烏喙杏仁牡蠣良

大麥蘖

氣溫

味甘鹹

無毒

象云補脾胃虛寬腸胃先杵細炒黃取麩用

本草云能消化宿食破癥結冷氣去心腹脹滿開胃
止霍亂除煩去痰治產後祕結鼓脹不通大麥并神
麩二藥氣虛人宜服以代戊己腐熟水穀與豆蔻縮
砂木瓜芍藥五味子烏梅為之使

小麥

氣微寒

味甘

無毒

本草云除熱止燥渴咽乾利小便養肝氣止漏血唾
血青蒿散有小毒百粒治大人小兒骨蒸肌熱婦人
勞熱

神麩

氣暖 味甘

入足陽明經

象云消食治脾胃食不化須於脾胃藥中少加之微
炒黃用

珍云益胃氣

本草云療臟腑中風氣調中下氣開胃消宿食主霍亂心膈氣痰逆除煩破癥結及補虛去冷氣除腸胃中塞不下食令人好顏色落胎下鬼胎又能治小兒腹堅大如盤胃中滿胎動不安或腰痛搶心下血不止火炒以助天五之氣入足陽明

酒

氣大熱

味苦甘辛

有毒

本草云主行藥勢殺百邪惡毒氣能行諸經不止與附子相同味辛者能散味苦者能下味甘者居中而緩也為導引可以通引一身之氣至極高之分若味淡者則利小便而速下大海或凝惟酒不冰三人晨行遇大寒一人食粥者病一人腹空者死一人飲酒者安則知其大熱也

苦酒

一名醋一名醢

氣溫

味酸

無毒

液云斂咽瘡主消癰腫散水氣殺邪毒予初錄本草

苦酒條本經一名醯又一名苦酒如為一物也及讀
金匱治黃疸有麻黃醇酒湯以美清酒五升煮二升
苦酒也前治黃汗有黃芪芍藥桂枝苦酒湯

飴 即膠飲

氣溫 味甘 無毒

入足太陰經藥

液云補虛之止渴去血以其色紫凝如深琥珀色謂之膠飴
色白而枯者非膠飴即飴糖也不可入藥用中滿不宜用嘔

家切忌為足太陰藥仲景謂嘔家不可用建中湯以甘故也

香豉

氣寒

味苦

陰也無毒

象云治傷寒頭痛煩躁滿悶生用

珍云去心中懊懣

本草云主傷寒頭痛寒熱傷寒初覺頭痛內熱脉洪起一二日便作此加減葱豉湯葱白一虎口豉一升綿裹以水三升煎取一升頓服取汗若不汗加葛根三兩水五升煮二升分二服又不汗加麻黃三兩去

節

玉石部

石膏

氣寒 味苦辛微寒大寒無毒

入手太陰經少陽經

足陽明經

象云治足陽明經中熱發熱惡熱燥熱日晡潮熱自汗小便滑赤大渴引飲肌肉壯熱苦頭痛之藥白虎

湯是也善治本經頭痛若無餘證勿用

心云細裏白澤者良甘寒胃經大寒藥潤肺除熱發散陰邪緩脾益氣

珍云辛甘陰中之陽止陽明經頭痛胃弱不可服下牙痛須用香白芷

本草云主中風寒熱心下逆氣驚喘口乾舌焦不能息腹中堅痛除邪鬼產乳金瘡除時氣頭痛身熱三焦大熱皮膚熱腸胃中膈氣解肌發汗止消渴煩逆

腹脹暴氣喘息咽熱亦可作浴湯

太上云石膏發汗辛寒入手太陰也

東垣云微寒足陽明也又治三焦皮膚大熱手少陽也仲景治傷寒陽明證身熱目痛鼻乾不得卧身已前胃之經也胃胃肺之室邪在陽明肺受火制故用辛寒以清肺所以號為白虎湯也鷄子為之使惡莽草馬目毒公

藥性論云石膏使惡巴豆唐本註療風去熱解肌

滑石

氣寒

味甘大寒

無毒

入足太陽經

象云治前陰不利性沉重能泄上氣令下行故曰滑則利竅不可與淡滲同用白者佳杵細水飛用

本草云主身熱洩瀉女子乳難癰閉利小便蕩腸胃積聚寒熱益精氣通九竅六腑津液去留結止渴令人利中入足太陽滑能利竅以通水道為至燥之劑

猪苓湯用滑石與阿膠同為滑利以利水道葱豉生薑同煎去粗澄清以解利淡味滲泄為陽解表利小便也若小便自利不宜以此解之

衍義云暴吐逆不下食以生細末二錢七溫水調服後以熟麵壓之

石硝

氣寒 味苦辛

象云除寒熱邪氣逐六腑積聚結痼血澀胃中食飲

熱結去血閉停痰痞滿消毒搽細生用

盆硝

即芒硝

氣寒

味鹹

心云去實熱經云熱淫於內治以鹹寒此之謂也
珍云純陰熱淫於內治以鹹寒

本草云主五臟積聚久熱胃閉除邪氣破留血腹中
痰實結轉通經脉及月水破五淋消腫毒療天行熱
病

藥性論云使味鹹有小毒通月閉癥瘕下瘰癧黃疸
主漆瘡散惡血

聖惠方治伐指用芒硝煎湯淋漬之愈

硝石

氣寒 味甘辛一作苦辛大寒無毒又云鹹又
云甜甜微緩於鹹

液云硝石者硝之總名也但不經火者謂之生硝石
硝經火者謂之盆硝芒硝古人用辛今人用鹹辛能

潤燥鹹能軟堅其意皆是老弱虛人可下者宜用若
用此者以玄明粉代之尤佳本經謂利小便而墮胎
傷寒姙娠可下者用此兼以_{大黃}引之直入_{大腸}潤
燥軟堅瀉熱子母俱安內經云有故無殞殞亦無殞
也此之謂歟以在下言之則便溺俱陰以前後言之
則前氣後血以腎言之總主大小便難溺澀秘結俱
為水少經云熱淫於內治以鹹寒佐以苦故用芒硝
大黃相須為使也

玄明粉

氣冷

味辛甘

無毒

液云治心熱煩躁五臟宿滯癥瘕明目逐膈上虛熱
消腫毒註中有治陰毒一句非伏陽不可用若止用
此除陰毒殺人甚速牙硝條下太清鍊靈砂補注謂
陰極之精能化火石之毒

仙經云陰中有陽之物

硫黃

氣溫大熱

味酸

有毒

本草云主婦人陰蝕疽痔惡血堅筋骨除頭瘡療心腹結聚邪氣冷癖在脇欬逆上氣脚冷疼弱無力及鼻衄惡瘡下部蠱瘡止血殺疥蟲

液云如太白丹佐以硝石來復丹用硝石之類至陽佐以至陰與仲景白通湯佐以人溺猪膽汁大意相同所以去格拒之寒兼有伏陽不得不爾如無伏陽只是陰證更不必以陰藥佐之也硫黃亦號將軍功

破邪歸正返滯還清挺出陽精消陰化魄生魂

雄黃

氣溫寒

味苦甘

有毒

本草云主寒熱鼠瘻惡瘡疽痔死肌疥蟲匿瘡目痛
鼻中息肉及絕筋破骨百節中大風積聚癰氣中惡
腹痛鬼疰

赤石脂

氣大溫

味甘辛酸

無毒

本草云主養心氣明日益精療腹痛泄痢下利赤白
小便利及癰疽瘡痔女子崩中漏下產難胞衣不下
久服補髓好顏色益志不飢輕身延年五色石脂各
入五臟補益

東垣云赤石脂白石脂並溫無毒畏黃芩芫花惡大
黃

本經云澁可去脫石脂為收斂之劑胞衣不出澁劑
可以下之赤入丙白入庚

珍云赤白石脂俱甘酸陽中之陰固脫

心云甘溫節末用去脫澁以固腸胃

局方本草云青石脂養肝膽氣明目黑石脂養腎氣
強陰主陰蝕瘡黃石脂養脾氣除黃疸餘與赤白同
功

禹餘糧

氣寒 味甘 無毒

本草云主欬逆寒熱煩滿下痢赤白血閉癥瘕大熱

本經云重可去怯禹餘糧之重為鎮固之劑

本草註云仲景治傷寒下痢不止心下痞硬利在下焦者赤石脂禹餘糧湯主之赤石脂禹餘糧各一斤並碎之以水六升煎取二升去粗分二服

雷公云看如石輕敲便碎可如粉也兼重重如葉子雌黃此能益脾安五臟

代赭石

氣寒

味苦甘

無毒一名須丸出姑幕者

名須丸出代郡者名代赭

入手少陰經

足厥陰經

本草云主鬼疰賊風蠱毒殺精物惡鬼腹中毒邪氣
女子赤沃漏下帶下百病產難胞衣不出墮胎養血
除五臟血脉中熱血痺血瘀大人小兒驚氣入腹及
陰痿不起

聖濟經云怯則氣浮重則所以鎮之怯乃亦驚也

鉛丹

氣微寒

味辛黃丹也

本草云主吐逆反胃驚癇癩疾除熱下氣止小便利
除毒熱筋攣金瘡溢血又能鎮心安魂止吐血

本經云澁可去脫而固氣

成無己云鉛丹收斂神氣以鎮驚也

藥性論云君治消渴煎膏止痛生肌

白粉

本草云一名胡粉一名定粉一名瓦粉仲景猪膚湯
用白粉非此白粉即白米粉也黃延非治胃中寒是
治胃中寒誤寫作寒字

藥性論云胡粉使又名定粉味甘辛無毒能治積聚
不消炒焦止小兒疳痢

陳藏器云主久痢成疳粉和水及鷄子白服以糞黑
為度為其殺蟲而止痢也

紫石英

氣溫

味甘辛

無毒

入手少陰經

足厥陰經

本草云主心腹欬逆邪氣補不足女子風寒在子宮
絕孕十年無子療上氣心腹痛寒熱邪氣結氣補心
氣不足定驚悸安魂魄填下焦止消渴除胃中久寒
散癰腫令人悅澤久服溫中輕身延年得茯苓人參
芍藥共療心中結氣得天雄菖蒲共療霍亂長石為

之使畏扁豆附子不欲鮫甲黃連麥句薑

衍義云仲景治風熱瘰癧風引湯紫石英寒水石石
膏乾薑大黃龍齒牡蠣甘草滑石等分右吹咀以水
一升煎去三分食後量多少溫呷之不用粗立效

伏龍肝

氣溫 味辛

時習云主婦人崩中吐血止欬逆吐血消癰腫

衍義云婦人惡露不止蠶沙一兩炒伏龍肝半兩同

為末溫酒調空心服三二錢以止為度

藥性論云單用亦可鹹無毒

日華子云熱微毒治鼻洪腸風帶下血崩泄精尿血
催生下胎及小兒夜啼一云治心痛及中風心煩

陶隱居云此竈中對釜月下黃土也

白礬

氣寒 味酸 無毒

本草云主寒熱泄瀉下痢白沃隱蝕惡瘡消痰止渴

除痼熱治咽喉閉目痛堅骨齒

藥性論云使有小毒生含嚙津治急喉痺

硃砂

味甘

珍云心熱者非此不能除

局方本草云丹硃味甘微寒無毒養精神安魂魄益
氣明目通血脉止煩渴

藥性論云君有大毒鎮心抽風

日華子云涼微毒潤心肺惡磁石畏鹹水

硃砂

味鹹

本草云破堅癖毒不用入羣隊用之味鹹苦辛溫有毒不宜多服主積聚破結血爛胎止痛下氣療欬嗽宿冷去惡肉生好肌柔金銀可為鐸藥

藥性論云有大毒畏漿水忌羊血味酸鹹能腐壞人腸胃生食之化人心為血能除冷病大益陽事

日華子云北庭砂味辛酸暖無毒畏一切酸補水臟
煖子宮消冷癖瘀血宿食氣塊痲痺及婦人血氣心
痛血崩帶下凡修製用黃丹石灰作墮煨亦使用無
毒桑金銀驢馬藥亦用

東流水

味平 無毒

時習云千里水及東流水主病後虛弱揚之萬過煮
藥收禁神效二者皆堪蕩滌邪穢此水潔淨誠與諸

水不同為雲母所畏鍊雲母粉用之

甘爛水

時習云揚之水上成珠者是也治霍亂及入膀胱治
奔豚藥用之殊勝

禽部

鷄子黃

氣溫 味甘

本草云陰不足補之以血若咽有瘡鷄子一枚去黃

苦酒傾殼中以半夏入苦酒中取殼置刀環上熬微沸去粗旋旋呷之又主除熱火瘡癩瘡可作琥珀神物黃和恒山朱為丸竹葉湯服治久瘡不差黃合鬚髮煎消為水療小兒驚熱下痢

獸部

龍骨

氣平微寒

味甘陽也

無毒

本草云主心腹鬼疰精物老魅欬逆泄痢膿血女子

漏下癥瘕堅結小兒熱氣驚風癩瘵心腹煩滿四肢痿
枯汗出夜卧自驚恚怒伏氣在心下不得喘息腸癰
內疽陰蝕止汗縮小便溺血養精定魂魄安五臟

本經云澁可去脫而固氣

成無己云龍骨牡蠣鉛丹皆收斂神氣以鎮驚丸用
燒通赤為粉畏石膏

珍云固大腸脫

麝香

氣溫

味辛

無毒

本草云主辟惡氣殺鬼精物療溫瘧蠱毒癩瘡去三尸蟲療諸凶邪鬼氣中惡心腹暴痛脹急痞滿風毒婦人產難墮胎

牛黃

氣平

味苦

有小毒

本草云主驚癇寒熱熱盛狂瘖逐鬼除邪療小兒百病諸癇熱口噤不開大人癲狂及墮胎久服令人不

忘又云磨指甲上黃者為真又云定魂魄人參為使
得牡丹菖蒲利耳目惡龍骨龍膽地黃畏牛膝

犀角

氣寒

味苦酸鹹微寒

無毒

象云治傷寒溫疫頭痛安心神止煩亂明目鎮驚治
中風失音小兒疔豆風熱驚癇鎔用

本草云主百毒蠱疰邪鬼瘴氣殺鈎吻鸕羽蛇毒除
邪不迷惑心智療傷寒溫疫頭痛寒熱諸毒氣能治

一切瘡腫破血

液云升麻代犀角說並見升麻條下易老療畜血分
三部上焦畜血犀角地黄湯中焦畜血桃仁承氣湯
下焦畜血抵當湯丸丸但緩於湯耳三法的當後之
用者無以復加

阿膠

氣微溫

味甘辛

無毒

甘辛平

味薄氣厚升也陽也

入手太陰經

足少陰經厥陰經

象云主心腹痛內崩補虛安胎堅筋骨和血脉益氣

止痢炮用

心云補肺金氣不足除不足甘溫補血出東阿得火
良

本草云主心腹內崩勞極洒洒如瘡狀腰腹痛四肢
酸痛女子下血安胎丈夫小腹痛虛勞羸瘦陰氣不

足脚酸不能久立養肝氣益安氣肺虛極損欬嗽唾
膿血非阿膠不補仲景猪苓湯用阿膠滑以利水道
活人書四物湯加減例妊娠下血者加阿膠

猪膚

氣寒 味甘

入足少陰經

液云猪皮味甘寒猪水畜也其氣先入腎解少陰客
熱是以猪膚解之加白蜜以潤燥除煩白粉以益氣

斷痢

猪膽汁

氣寒 味苦 鹹 苦 寒

液云仲景白通湯加此汁與人尿 鹹寒同與熱劑合
去格拒之寒又與醋相合內穀道中酸苦益陰以潤
燥瀉便

本經云治傷寒熱渴又白猪蹄可用雜青色者不可
食療疾亦不可

心云與人尿同體補肝而和陰引置陽不被格拒能
入心而通脉

獼肝

味甘 有毒

本草云主鬼疰蠱毒却魚鯁止久嗽燒灰服之

猴鼠糞

治傷寒勞復經言牡鼠糞兩頭尖者是或在人家諸
物中遺者

人尿

時習云療寒熱頭疼溫氣童男子者尤良

衍義云人尿須用童男者產後溫一杯壓下敗血惡物久服令人反虛氣血無熱尤不可多服此亦性寒故治熱勞方中亦用也

日華子云小便涼止勞渴嗽潤心肺療血悶熱狂撲損瘀血暈絕及蛇犬等咬以熱尿患處難產胞衣不下即取一升用薑葱煎乘熱飲即下

蟲部

牡蠣

氣微寒

味鹹平

入足少陰

象云治傷寒寒熱溫瘧女子帶下赤白止汗止心痛
氣結澁大小腸治心脇痞燒白杵細用

珍云能軟積氣之痞經曰鹹能軟堅

心云鹹平熬泄水氣

本草云主傷寒熱溫瘧洒洒驚恚怒氣除拘攣鼠瘦
女子帶下赤白除留熱在關節榮衛虛熱往來不定
煩滿止汗心通氣結止渴除老血澁大小腸止大小
便療泄精喉痺欬嗽心脇下痞熱能去瘰癧一切瘡
腫入足少陰鹹為軟堅之劑以柴胡引之故能去脇
下之硬以茶引之能消結核以大黄引之能除股間
腫地黄為之使能益精收澁止小便本腎經之藥也
久服強骨節殺邪鬼延年貝母為之使得甘草牛膝

遠志蛇床子良惡麻黃吳茱萸辛夷

藥性論云君主之劑治女子崩中止血及盜汗除風
熱定痛治溫瘧又和杜仲服止盜汗為末蜜丸服三
十九令人面光白永不值時氣又治鬼交精出病人
虛而多熱加用之并地黃小草

陳士良云牡蠣搗粉粉能治大人小兒盜汗和麻黃
根蛇床子乾薑為粉粉去陰汗衍義意同

文蛤

氣平

味鹹

無毒

本草云主惡瘡蝕五痔欬逆胃痺腰痛脇急鼠瘻大
孔出血崩中漏下能利水治急疔蝕口鼻數日盡欲
死燒灰臘猪脂和塗之墜痰軟堅止渴收澁固濟蛤
粉也鹹能走腎可以勝水文蛤尖而有紫斑

虫蟲

氣微寒

味苦平

有毒

本草云主目中赤痛皆傷淚出瘀血血間寒熱酸慙

無子炒去翅足

水蛭 一名馬蝗

氣微寒

味鹹苦平

有毒

本草云主逐惡血瘀血月閉破血癥積聚無子利水道墮胎炒用畏鹽苦走血鹹勝血仲景抵當湯用生蟲水蛭鹹苦以泄畜血故

經云有故無損也雖可用之亦不甚安莫若四物湯加酒浸大黃各半下之極妙

麀蟲

味鹹寒

有毒

本草云主心腹寒熱洒洒血積癥瘕破堅下血閉生
子大良仲景主治久瘕積結有大黃麀蟲丸

衍義云乳汁不行研一枚水半合濾清汁服勿令服
藥人知之

鼠婦

氣溫

微寒

味酸

無毒

本草云主氣癰不得小便婦人月水閉血癥癰瘕寒熱利水道仲景治久瘧大驚甲九中使之以其主寒熱也

衍義云鼠婦濕生蟲也

蜘蛛

微寒

本草云主大人小兒癩疔七月七日取其網療喜忘仲景治雜病狐疝偏有大小時時上下者蜘蛛一十

四箇熬焦桂半兩研細為散八分匕酒調服日再蜜
丸亦通

蟻螯

微寒微溫

味鹹

有毒

本草云主惡血血瘀痺氣破折血在脇下堅滿痛月
閉目中淫膚青翳白膜吐血在胃中不去及破骨踈
折血結金瘡血塞產後中寒下乳汁仲景治雜病大
黃廔蟲丸中用之以其主脇下堅滿也續傳信方治

喉痺取蟲汁點在喉中下即喉開也時習補入

蜜

氣平微溫

味甘

無毒

本草云主心腹邪氣諸驚癇瘕安五臟諸不足益氣
補中止痛解毒除衆病和百藥養脾氣除心煩飲食
不下止腸澼飢中疼痛口瘡明耳目

液云凡煉蜜必須用火熬開以紙覆經宿紙上去蠟
盡再熬色變不可過度令熟入藥

金匱要略卷之三十一
卷下
蠅

氣寒

味酸

有毒

本草云治小兒驚風癩腹脹寒熱大人癩疾狂易
手足端寒支滿奔豚

日華子云墮胎治疰忤和乾薑傳惡瘡出箭頭

圖經云心主丁瘡

衍義云大小二種一種大者為胡蠅身黑光腹翼
下有小黃子附母飛行晝不出夜方飛至人家戶庭

中見燈光則來一種小者身黑暗晝方飛出夜不出
今當用胡蠅蝗以其小者研三十枚以水灌牛馬腸
結佳

熬魚甲

氣平 味鹹 無毒

本草云主心腹癥瘕堅積寒熱去鼻中瘕肉陰蝕痔
惡肉療溫瘧血瘕腰痛小兒脇下堅

衍義云治勞嗽除骨蒸佳

蛇蛻

心云去翳膜用之取其意也

日華子云止嘔逆小兒驚悸客忤催生癰瘍白癩風煎汁傳入藥灸用

蟬蛻

心云治同蛇蛻

藥性論云使治小兒渾身壯熱驚癇兼能止渴又云其蛻殼頭上有一角如冠狀謂之蟬花最佳味甘寒

無毒主小兒天吊驚癇瘈瘲夜啼心悸

白僵蠶

味鹹辛平

無毒

本草云主小兒驚癇夜啼去三蟲滅黑黥令人面色
好男子陰瘍病女子崩中赤白產後餘痛滅諸癩痕
生潁川平澤四月取自死者勿令中濕濕中有毒不
可用

斑貓

味辛寒

有毒

本草云主寒熱鬼疰蠱毒鼠瘻疥癬惡瘡疽蝕死肌
破石瘰血積傷人肌墮胎畏巴豆

烏蛇

無毒

本草云主諸風瘙癢疹疥癬皮膚不仁頑痺諸風用
之炙入丸散浸酒合膏背有三稜色黑如漆性善不
噬物江東有黑稍蛇能纏物至死亦是其類生商洛

山

五靈脂

味甘溫


無毒

本草云主療心腹冷氣小兒五疳辟疫治腸風通利
氣脉女子月閉出北地此是寒號蟲糞也

紺帛

液云主惡瘡丁腫毒腫諸瘡有根者作膏用帛如手
大取露蜂房攪頭棘刺爛草節二寸許亂髮燒末作

膏主丁瘡腫又主小兒初生臍未落時腫痛水出燒
為末細研傅之又五色帛主盜汗拭乾訖棄五道頭
仲景治墜馬及一切筋骨損方中用



湯液本草卷下